

明代傳記叢刊・名人類①⑨
周駿富輯

明名臣言行錄 (五)

(清)徐開任編輯

明文書局印行

wt 75/14

明名臣言行錄卷第七十五

卷七十五

尚書李襄毅公化龍

字于田號霖寰大名長垣人萬曆甲戌進士官至少傅兼太子太保兵部尚書卒年五十八

初授蒿縣令陞南工部主事歷郎中陞河南提學僉事轉叅議遷山東提學副使叅政河南晉太僕少卿遼東巡撫

時倭奴已蹂朝鮮窺中國而遼歲苦鹵患會東鹵卜彥西鹵杪花把兔之屬合謀闌入公先檄大將董一元匿精兵鎮武堡誘卜彥至擊之斬首四百級又遣別

將孫守廉等夜襲抄花營解右屯圍二鹵皆狼狽引去居無何鹵復連犯公連破之搗其巢又大破之有靖遠高平什方寺之捷當是時鹵不敢犯遼陽登萊天津而王師得一意與倭戰也

楊應龍反播州公授尚方賜劍總督川廣湖貴諸軍事至則南川飛練綦江已焚戮而重慶且告急公密諭其守臣堅壁壘固守而姑爲文告緩賊疏請徵兵諸路而簡用其大帥明年春諸路帥各以兵至有衆二十萬公分五監六師以八道進討推官高折枝先以南川兵進據桑木帥馬孔英繼至再勝金子壩連勝

高坪克海門關以逼賊巢

總兵劉綎素有威名其家丁良馬皆可決勝然夙與應龍昵人皆疑之於是總督延入臥內輸心腹且以危言激之引其父顯九絲功爲比綎大慟願誓死報効總督乃騰書於朝遂委綎專制進碁江破三峒與賊父子遇連戰皆捷取婁山關入其養馬城帥吳廣進合江用間降安羅三寨擊斬賊將郭通緒入崖門再捷牛水塘棲賊於岡而逼其後戶帥陳璘進偏橋掃四牌七牌苗下長坎躡青蛇畧大小三渡設牌柵以防賊逸帥童元鎮進烏江戰不利合水西兵勝于母

氏固帥李應祥亦招降彞進戰有功當是時諸將畢
集海龍圍下而公以父憂奉詔墨線視師責戰益急
六月五日縋連破其外關廣璘潛師攻圍後遂入大
城應龍自縊死檻其妻孥黨屬歸京師所捕斬首鹵
二萬二千六百有奇俘獲無筭賊旣平條上善後十
二事分其地郡縣之又立屯衛郵置學校田稅之制
蓋千年彞壤隸於職方

公旣成播功而歸天子起公治河先是河臣創議開泃
河功未就公疏因之便拓其遺跡爲新渠堤閘具修
歲漕數百萬無梗再以艱去召爲兵部尚書協理戎

政有整飭營務十二事旣秉樞有防邊任將十六事其營務疏畧曰京軍之可虞者其身貧苦而不知有生人之樂其心離散而不知有急軍之誼凡人必結其心乃可得其力必同其休乃可共其戚今之飭營務者其要領亦惟曰去其疾苦蠲其靡濫使京軍擔石之糧盡得及於身而潤於其家夫然後約束可申而軍容可習也夫營軍有十二苦十一濫十九宜十二苦去則軍士傷心之怨少蠲十一濫清則軍士剝膚之災半減十九宜行則軍士元氣已復而神氣漸振臣三月以來廣詢博採晝作夜思熟計其便幸賜裁

察施行

其防邊任將疏畧曰臣惟用人一節待用在將帥本原在臣部本正而末正自然之勢也臣惟是守皇上之法使人可以洞見臣心而不疑有功必錄有罪必懲積閔及期而必遷營進躁兢而必黜才實可伏縱謗書盈篋而不行中未必有卽譽言日至而必擯以摧轂之事權歸朝廷之威命要於中外將領專精神於功伐一路庶幾可以得干城之用謹陳任將之事八防邊之宜八公之苦心憂國深計疆事治兵必優恤士伍用將必憐愛人材大概如此亦足以見公臨戎

制勝之本矣

三十六年三月職方主事葉世英言東方寢盛鎮江寬
奠之間必先壯其聲勢乃能伐其陰謀公爲戎政尚
書亦言遼左危在旦夕皆因稅監高淮擾民激亂以
爲東方之資

尚書涂恭襄公宗濬

字及甫南昌人萬曆癸未進士官至兵部尚書天啓初年卒謚恭襄

授慈谿知縣補蘄水調繁江陵黃岡皆有政績考選山東道御史巡按廣西河南山西時鄭洛方經畧西事公上疏論洛始終主和厚遣閼氏要結擄力克回巢權紆邊難寧夏兵變復薦李材可任請令立功贖罪不報朝鮮中倭條聚餉訓兵等四事請錄用逐臣孫丕揚鍾羽正鄒元標等亦不報乃具疏引疾不許二十七年再按順天遼東稅監高淮暴橫公劾其懷奸

越俎請旨嚴飭勿干預政務准以事陷永通判羅大器復疏辨其廉謹亦不報

時議征播州公言楊應龍衆叛親離緣勦議未定或恐改土爲流羣懷觀望宜明詔諸蠻誅止首惡若安氏及七姓五司能禽斬應龍來獻卽裂地予世守平清偏鎮諸處乃入黔要害白泥飛練尤轉輸所必經請命湖撫移鎮沅州我兵新練未知地利應行南丹東蘭泗城三司各選土兵三千聽川督調發仍勅督撫條上方畧假以便宣帝是其議前後積臺資九年陞大理寺丞歷左右少卿給事中錢夢臯以楚宗事欲

追禡侍郎郭正域并論左都御史溫純坐以朋黨而
外轉給事中鍾兆斗復繼夢臯極論純連章求去公
上疏駁之皆切直留中

三十四年陞都察院右僉都御史巡撫延綏保寧堡當
極邊舊設叅將守之而波羅在延安西止用守備防
禦前巡撫鄭汝璧覈兵更易將卒戍兵遂寡弱公請
復舊制已猛克什力等果犯保寧叅將高繼光禦之
格斬二百五十餘級邊鹽雍滯榆林道陳性學條六
弊公疏上之因言小稟盛行官引愈滯二路軍資缺
乏請行禁革從之猛克什力等復犯神木波羅公易

明倫彙編 家範典 卷一百一十三
總兵張承胤遊擊杜文煥等擊走之斬獲千八十二級陞右副都御史蔭一子錦衣百戶

三十九年沙計挾欵遂大舉入寇公率承胤東援斬級百有二十七沙計走二月陞兵部右侍郎兼右僉都御史總督宣大山西軍務當是時順義王椿力克已死卜石兔以長孫當嗣素囊爭之王封六年不成至是五路台吉糾合七十三台吉攻素囊右卜石兔而素囊與忠順夫人亦修戰具拒之公兼程至鎮河諭素囊解兵又檄五路等循彼俗先婚後封皆退聽於是卜石兔及忠順夫人議婚方封侯而五路復要忠

順割板升之半予卜石兔忠順不從五路復構兵忠
順懼賄以名馬金幣乃止公言忠順諸部之主也五
路要挾忠順不能制則忠順孤而五路益強將以挾
忠順者挾中國矣請調還賀世賢於大同報可

四十年夏忠順夫人卒公以三世款貢請恩優卹詔予
祭七壇九月東西各部吉能素囊等款關援俺答例
爲卜石兔請封公疏言封事不成由忠順年老拒婚
素囊復據彼俗家財例與少子而卜石兔窶弱藉五
路等爲聲援臣等嚴加備禦不言王封其計始窮今
三枝十二部各投結請封應請如例查俺答時東自

宣府西至河套皆責令約束今宣府白洪大河套吉能皆各爲一部順義所制者山西大同三枝十二部而已十二部中智力相雄長者五路台吉也兵馬足抗卜石兔者素囊也公正服諸部者兀慎也恭順能調和素囊者把漢比妓也臣借素囊兵力樹兩匈奴之形而以把漢恭順調素囊之悍以兀慎公正破諸部之奸三人歸心則十二部衆臣皆得而聯屬之今旣就封五路等宜各加陞授於是卜石兔襲封順義王封把漢比妓忠義夫人五路等各都督同知僉事有差